

Na osnovu člana 31. Statuta Udruženja poslodavaca FBiH, Upravni odbor UP FBiH, na svojoj **31 sjednici održanoj dana 14.04.2022.godine** u Sarajevu, donosi:

**ODLUKA O POKRETANJU AKTIVNOSTI ZA RAD NA OSNIVANJU PRIVREDNOG DRUŠTVA ZA
OBAVLJANJE STRUČNIH POSLOVA IZ OBLASTI ZAŠTITE NA RADU**

Član 1.

Udruženje poslodavaca Federacije BiH će sprovesti anketu među članovima Upravnog odbora i tijelima UPFBiH o potrebama osnivanja privrednog društva za obavljanje stručnih poslova iz oblasti zaštite na radu.

Član 2.

Ukoliko rezultati ankete iz člana 1. ove Odluke pokažu potrebu za osnivanjem privrednog društva, pokrenut će se radnje za donošenje Osnivačkog akta za osnivanje privrednog društva d.o.o.

Član 3.

Ovlašćuje se predsjednik da u slučaju iz člana 2. ove Odluke u saradnji sa direktorom poduzme sve potrebne radnje za pokretanje aktivnosti za osnivanje privrednog društva.

Član 4.

Ova Odluka stupa na snagu danom donošenja.

Obrazloženje

Shodno Zakon o zaštiti na radu u Federaciji Bosne i Hercegovine svi poslodavci su obavezni donijeti akt o procjeni rizika. **Naime, poslodavac je dužan da za svako radno mjesto izvrši procjenu rizika i odredi poslove sa povećanim rizikom, na način i pod uslovima utvrđenim Zakonom. Procjenu rizika vrše ovlaštene organizacije licencirane od strane Ministarstva rada i socijalne politike.**

Imajući u vidu da **je procjena rizika obavezna za sve poslodavce u FBiH**, ovlaštene organizacije obzirom da ih ima veoma malo, **zloupotrebljavaju svoj položaj, a cijene usluga procjene rizika su veoma visoke i neprihvatljive za poslodavce**. Prema našim informacijama, ovlaštene organizacije drugačije postupaju i definišu svoje usluge prema broju zaposlenih, što je suprotno zakonu i podzakonskim aktima. Ovlaštene organizacije ne mogu naplaćivati pružene usluge prema broju zaposlenih ili radnom mjestu. Cijene ovlaštenih organizacija nisu jedinstvene, a **ponude koje dobijaju poslodavci su enormno visoke**.

Shodno navedenom Udruženje poslodavaca FBiH je odlučilo pokreniti aktivnosti i osnovati privredno društvo d.o.o. za obavljanje stručnih poslova iz oblasti zaštite na radu, koja bi isključivo obavljala usluge za članice UPFBiH, po znatno povoljnijim cijenama.

Prema članu 64. Zakona o zaštiti na radu privrednom društvu ili ustanovi koja ispunjava kadrovske, organizacijske, tehničke i druge uvjete (u daljnjem tekstu: ovlaštena organizacija), federalni ministar izdaje dozvolu za obavljanje stručnih poslova iz oblasti zaštite na radu.

Za osnivanje privrednog društva d.o.o. prema Zakonu o privrednim društvima („Sl. novine FBiH“ broj 81/2015 i 75/2021) minimalni **osnivački ulog je 1.000,00 KM**. Pored minimalnog osnivačkog uloga za osnivanje su potrebni i troškovi sudskih taksi i ovjera, objava u službenom listu koji koštaju sve ukopno dodatnih 1.000,00 KM.

Prema Pravilniku o uvjetima koje moraju ispunjavati ovlaštene organizacije za obavljanje stručnih poslova iz oblasti zaštite na radu privredno društvo da bi dobilo licencu ovlaštena organizacija mora ispunjavati kadrovske i tehničke uslove. U pogledu kadrovskih uslova ovlaštena **organizacija mora imati uposlena 3 osobe**:

- a) jedan diplomirani inženjer hemije ili diplomirani inženjer hemijske tehnologije ili diplomirani tehnolog ili bachelor hemije ili bachelor inženjer hemijskog inženjerstva i tehnologije,
- b) jedan diplomirani biolog ili diplomirani inženjer medicinsko-laboratorijske dijagnostike ili bachelor biologije (smjer: biohemija i fiziologija, mikrobiologija, nastavnički),
- c) jedan diplomirani inženjer hemije ili diplomirani inženjer hemijske tehnologije ili diplomirani tehnolog ili diplomirani biolog ili diplomirani inženjer zaštite na radu ili diplomirani inženjer fizike ili bachelor hemije ili bachelor inženjer hemijskog inženjerstva i tehnologije ili bachelor biologije (smjer: biohemija i fiziologija, mikrobiologija, nastavnički) ili bachelor inženjer sigurnosti i pomoći ili bachelor fizike.

U tom smislu potrebno je mjesečno obezbijediti plaće za tri uposlenika. Pored kadrovskih uslova ovlaštena organizacija mora ispunjavatii tehničke uslove (oprema, labaratorija, prostor). Prema ponudama koje je dobilo UPFBiH za **prostor, uređaje, opremu labaratorije** **potrebno je cc 200.000 KM.**

Navedena oprema koja se nabavi za ovlaštenu organizaciju može se iskoristiti i za kontrolu ispravnosti mlijeka i mliječnih proizvoda.

U tom smislu potrebna je garancija članica UPFBiH da će usluge procjene rizika vršiti kod ovlaštene organizacija koju formira UPFBiH. UPFBiH bi obezbijedilo sredstva za osnivanje, prostor i opremu kao i 3 mjeseca za plate uposlenog osoblja ovlaštene organizacije, a koja bi bila vraćena iz sredstava obavljanja usluga za članstvo.

Dakle, privredno društvo za obavljanje stručnih poslova iz oblasti zaštite na radu nudilo bi usluge našem članstvu čak i do 30% niže od ponude postojećih ovlaštenih organizacija u cilju zaštite interesa članstva.

Cijena usluga za članstvo bi bila samo pokrivanje troškova rada ovlaštene organizacije i cilj ne bi bio profit niti zarada, a na osnovu čega bi i cijene za članstvo mogle biti i do 30% manje u odnosu na druge ovlaštene organizacije.

Upravo zbog svega navedenog UPFBiH smatra da bi za članstvo bilo veoma korisno osnovati privredno društvo za obavljanje stručnih poslova iz oblasti zaštite na radu.

DIREKTOR
Mladen Pandurević